

## **Kerweredd 2023**

Ihr liewe Leit' was bin ich froh,  
die Studrumer Kerwe ist wieder do.

Vier Johr lang henn mer waade misse,  
bis mer die Studrumer Fahne kenne widder hisse..  
Apropo Fahnel Viele im Ort hän in de letschde Johre gekrische,  
mehr hän gar kä Fahn' mehr zum hisse.

Es Batkes ihrn Thomas hot fix welsche bestellt,  
doch jetzt sitzt er druff, weil käner mehr welche nemmt.  
Also nemmt eich e Herz und klingeln beim Batke,  
der gibt euch die Fahne, dann kennt ihr se hisse,  
es sei denn Ihr dunn kurz vor der Kerwe eiern Fahnemascht vermisse.

Was sunscht noch so los war in unserm Ort, domit fahre jetzt unsre zwä schöne  
Kerwemaids fort.....

Vor 4 Johr do gings los  
 Corona hieß unser großes Los.  
 Man sieht en net  
 Doch is er da  
 Des is net werklisch wunnerbar  
 Händ wäsche des is wischdisch  
 Net zu kurz - net zu flüchtisch.  
 De Mundschutz musste ganz schnell her  
 Der des Gsischt versperrt so sehr  
 Tests solle mer mache,  
 Bei zwe Strich hoschts gewusst  
 Covid hoscht jetzt im Rache,  
 Do wars dirs erschdemol bewusst  
 Quarantäne hieß es jetzt fer dich  
 Ob 5, 6 oder 7 dache  
 So genau konnte dir des Kenner sache.  
 Klopapier und Nudle kaften alle eu  
 Will jo jeder gut versorgt seu  
 Astrazenca, Moderna und Biontec  
 Für manche war des efach nur Dreck  
 Awa impfe is doch wischtisch  
 sunscht werd des Virus net nischtisch.  
 Jetzt is endlich schluss domit  
 Mir gewen corona en große arschtritt.

Wem is die Kerwe???

Unser!!!

Die News von Ort so wie sich kährt  
 geteilt uff Facebook - ob wahr oder verkährt.  
 Gerischte gibt es hier und dord,  
 eh echti Berihmtheit - hawen aach mir im Ord.  
 London hot Jack The ripper  
 Studrum hot de Katze Ripper.  
 30 Seele hot er uns geglaut,  
 dass er sich noch durch de Ort zu laafe draut.  
 Ens dir ripper - sei dir gsaacht,  
 mir gehn jetzt all uff die Jagd.  
 Kriegen mir dich ens zwe drei,  
 ist des Katze sterwe bei uns vorbei.  
 Sollde wir dich doch net kriege - du Gemeiner katze ripper -  
 wünschen mir dir en Tripper.

Wem is die Kerwe???

Unser!!!

Im Aag' muss mer in de südliche Oggerschummer Stroß ach sei Audo behalle,  
 den plötzlich gibt's Strofzettel, wenn mer uff'm Grünstreife halle.  
 Johrelang wars fer die Stadt ok  
 und plötzlich duts im Geldbeidl weh.  
 55 Euro muss mer berappe,  
 wenn ohne Ahkindischung plötzlich die Leit vom Ordnungsamt durch die Stroße  
 dabbe.  
 De Ärger war groß,  
 die Polidig hot (do druff hie) viel versproche,  
 awwer bis heit ist ned viel geloffe.

Wem es die Kerwe???

Unser!!!

He ihr Leit ihr hab's jo kährt  
 in Studrum is es Lewenswert.  
 Eh Kärch, eh Schul, en Brunne nix ist uns abhande kumme.  
 Do fällt ma doch e Sach noch eu, de Real is verschwunne.  
 Zerfalle zu Staub - was de Nachbarschaft die Nerve raubt.  
 Nur zwische viele kläne ritze,  
 sieht man ihn bei de leit als Staub noch blitze.  
 Awa Bagger hi - Bagger her  
 neue G'schäfte missen her.  
 Ke woi, ke worscht, ke Bägger,  
 wenn`s noch long so bleibt gibt`s gemägger.  
 Die anner Hälft von de Gschicht,  
 is en Investor doch manche traun ihm nischt.  
 Viele Mensche, kleene Stroße do muss man nochmol de Investor Frage,  
 wo sollen die all ihre Autos parge.  
 Eh Dorf muss wachse, ah für die Vereine,  
 sunschd sind die Macher am End ganz alleine.  
 Die Zukunft die sieht rosisch aus,  
 Krach und Staab bleiben ufm Weg dohi net aus.  
 Mir freue uns uff die neue leit,  
 uff die Gschäfte - hoffendlich is es bald soweid.

**Wem is die Kerwe???**

**Unser!!!**

Ihr lieve Leit mir wissen doch sehr  
 Es wurd äfach Zeit en neue Verein muss her.  
 Die Idee war gebore, mit hams alle verzählt,  
 Fascht all waren se begeischtert so wies do steht.  
 Die SAG wurd gegrünt, des is vermoß,  
 Selbscht in de Reipalz war einiges do rüwer los.  
 Die Idee sind jung und frisch  
 Und endlich sitze mehr widda all an äm Disch.

Viele ausm Dorf sind zamme kumme,  
 De alte unmut scheint verschwunne.  
 Mit frische Gedange planen se Feschte in lange Abendstunne.

Des erschde Fescht war de Weihnachtsmarkt.  
 So viel war do noch nie los,  
 die menschenmenge ganz vermoß.  
 unsern Weihnachtsmarkt war noch nie so groß.  
 De Schulhof ham se schä gemacht  
 des war e wahri Licherpracht.

Mir dachten erscht mir hängen fescht  
 Awer dann kam a Idee vum Knöppel Bernd,  
 Und so gabs dann des zwedde Fescht.  
 Mir hams also net verlernt.

De Winter ham se verbrennt,  
 Mit nem schöne Schneemann ins Pfarrheim gerennt.  
 Un dann mit ordentlich zunder unnerm arsch  
 abgebrennt.

Des nächste Fescht, wie jedes Johr am 1. Mai - des Maibaumfescht  
 Des johr dovor musste de alde Maibaam uf emol schnell weg,  
 Des war en große schreck.  
 Doch dies johr a wunna wei - wurde die alte AG bestohle,  
 Sowas is net feu.  
 De Stamm der hot sich jo dann noch gfunne,  
 En neue Granz denn ham mer dann selwer gebunne.

Der is uns besonders schää gelunge.  
 Plötzlich am Fescht, wie aus Geischderhand  
 Kam de Strom uns Wasser abhand.  
 Awa bleed simma jo net,  
 Vum Nachbar ham se efach Strom riwer gelegt.  
 Gefeiert ham se trotzdem wie die große,  
 Do druf kann ma jo mol zamme o stoße.  
 Am nächste dach alles schick,  
 Kam Strom und Wasser efach wieder zurück.

Unsere Kerwe des is es beschte  
 Für uns isses des fescht der feschte.  
 Ganz offiziell bei de Stadt beworbe,  
 Wurd de Jungs de Spaß direkt verdorwe,  
 En Mitbewerwer soll es gewe,  
 Wer kann hier noch nach ener tolle Kerwe strewe?  
 Wochenlang hot sich die Stadt berode,  
 Wer sorgt an de Kerwe wohl für die beschde quote?  
 Gott sei Dank hot die SAG gewunne,  
 Ihr liewe Leit,  
 Jetzt sin ma als Dorf richtisch verbunne.  
 Drum lasst uns feiern immer munter,  
 Ich frog euch nur äns  
 Wem is die Kerwe?

Unser!

Ich kanns net losse  
und des macht mich ganz verdrosse,  
es gab widder mol so e Posse.

Was war bassiert?

Inre Nacht- und Newwelaktion hot er klamm heimlich de Kerweplatz verlosse.

Wer?

Die Red is vum Kerwebamstänner, den versteckt jetzt irgend so en arme .....  
(Mensch)

Wem es die Kerwe???

Unser!!!

Bsuch sollte mer kriege von weid und fern  
Eigentlich hawn mir doch alle gern

In die Sporthall sollden Flüchtling kumme  
Ganz Frangedal war dofun eugenomme  
Aach an unser Eichwiesehall wurd gedacht  
Awa unsern Sport is doch a wahri Pracht  
Des wolle mer uns doch net nehme lasse  
Des gonze Dorf konnts äfach net fasse.

Do ham mer doch schnell a paar unnerschrifte gsammelt  
Doch manch ener hot lieber Dier und Fenschter verrammelt.

Noch langem priefe, hie und her,  
Ob die Hall geeignet wär,  
A Lösung fand so schnell keener,  
jetzt stehn ufm Feschpladz Condäner.  
so solls halt soi,  
Do druf trinke mehr doch en Woi.

Wem is die Kerwe???

Unser!!!

**Zu guder letscht wie konns anderschd soi,  
hier geht's net nur um uns alloi:**

**Macht mit bei de SAG, de KG oder beim SV.  
Bei de Landfraue**

**muscht du a net soi unbedingt e Frau.**

**Heidzudach geht alles,**

**Mann, Frau, Pony oder e Dos Bier.**

**Willkomme bischt du immer hier.**

**Studrum muss lebe, soll feiere, kann saufe,  
und sich net gegenseitig die Hoor ausraufe.**

**Ihr liewe Studrumer,**

**uf euch misse mehr zähle,**

**un mir bitten euch instännisch gehen nächscht johr all wähle!**

**Jetzt losse mer den politische Kram beiseit,**

**den ens zählt jetzt fer die Kerwe und net nur heit:**

**Losst uns feiern, tanze und singe - und efach mol zamme –**

**ä rischtisch schöne Kerwe verbringe!**

**Wem ist die Kerwe?**

**Unser!!!**